

鳴玉堂稿

鳴玉堂稿卷之六

明甘肅行太僕寺卿前湖廣督學副使山陰張天復者翰林院修撰不肖男元忬謹校

山東左叅政門人陳文燭選梓

狀類

魚山郭先生行狀

魚山先生者今祠部主事郭君父也郭君為祠部秩滿例得貤封其翁若母嘗謂復曰藩無以光揚世德濫竽踰數月得

恩典以歸圖家慶焉願不違矣蓋時與復沾沾喜是歲仲春聞先生病且亟祠部君匍匐過復而謀

所以砭劑其疾者且曰吾父少時以嗜學攻苦至
廢寢食窮年矻矻不替也乃衝冒風濕病入腰膝
間且若干年初謂可幸瘥也而今漸益跼蹐至偃
倮以步脫不能療奈何於是自京師乞醫走二百
里以歸醫未至而先生之訃聞矣則又苦次骨立
嗚咽而謂復曰藩不肖釁禍自天僅僅數月竟不
能使吾父沐冠組之榮矣顧吾父挾竒抱遠無以
自見而其志與負不遂泯沒以死者不肖不敢忘
也願君為吾父狀述其生平而請乞所以表志於
墓者復不敢虛辱因忘不佞而為之狀先生少時

雋穎學易能日涉千言其翁為先生傾貲延師既
屢易而未得其人先生瞿然起曰嗟善學者自得
師耳柰何徒賴人為於是閉門覃思踰年而頓悟
旨歸有司甄其文入鄉校屢試冠多士每給廩餼
學宮則馳負以歸其翁若母翁若母喜曰吾兒已
食祿吾何羨耶先生尤善色養嘗夜分持甘旨為
翁壽翁至醉有盜數人挾刃踰垣以入厲聲曰吾
必殺而父子先生倉皇起避將出戶顧翁猶在坐
復急入肩翁以出及門而蹶仆地盜幾及身先生
不顧躍起力走乃得脫盜掠其貲以去父子竟免

於難踰數年母病疽危甚醫不能瘳先生曰割股
吮癰非人子所為耶乃焚香以禱以舌吮疽疽血
淋瀝痛已疽愈浟旬而母康壽如故翁若母罹黠
賊危疽瀕於死而先生皆以其身抗扶而獨拯之
謂誠孝感召非邪乃數奇命違屢躋場屋而卒能
以其所挾負庭訓祠部君祠部君遂夙成大器弱
冠即蜚聲士林嘉靖丙午先生猶隸之就試祠部
君輒取上第而先生復淪落稍無難色忻然謂曰
此吾父志也予勞生強半不可得而吾兒早成父
志予復何希望耶時先生母已亡惟翁在堂先生

亟馳歸挈鹿鳴宴具獻翁而享妣於祠下且喜且
泣愴如也其孝思純篤類如此丁未春祠部君成
進士初授河東聞喜縣令是年先生失怙終日悲
號以不能致其親目睹祠部君榮顯為恨至暈絕
復甦既襄事即促祠部君疾之官就道力請迎養
先生堅不可已而泣曰吾固不忍遽離而祖丘隴
顧若年少未諳練世故脫取戾于上下如而祖志
何因共往時以廉勤貞幹箴警祠部君祠部君每
為感勵聞喜俗尚侈縻婚娶務厚其奩聘至有長
大不遂家室者喪尤尚易單弱之家或停棺數年

以待豐饒而後舉不豐饒不獲葬也先生謂為風俗首弊宜亟正之祠部君蒞政即嚴為禁絕皆懽呼載道無不稱當俗遂反而之正其他平徭息訟惇教厚俗得先生之教為多祠部君竟成令名三月而政通先生曰嘻吾兒可無慮矣遂馳歸廬側謝絕交際郡邑長吏有造其廬而吊先生者先生不為往也其志節高雅又如此祠部君為聞喜三年以績擢戶曹尋轉今官先生皆以疾不能至京師竟以是卒於正寢蓋甲寅三月二日也距其生正德丙寅二月十一日享年四十有九嗚呼先生

終其身不獲少騁其志而其所挾負施置迄於祠
部君見之祠部君洽聞多才其所表見又駸駸未
艾也然則先生所樹建豈必於其躬邪斯亦足為
不死矣先生諱囊字隱之別號魚山高祖某曾祖
某祖某父某世隱德居金鄉之某里母某氏生先
生一人女第三人配安人黃氏長先生二歲賢淑
有士行生丈夫子二人長曰東藩即祠部君娶邑
著姓李介女次曰東井聘庠生王子中女女子二
人長適同邑吳守次適陳好學祠部君生子一曰
金城垂髫穎拔可卜世其祖武

總督陝西三邊軍務太子太保光祿大夫兵部尚書兼都察院右僉都御史石岡王公行狀

公諱以旂字士招石岡其別號也其先姑蘇人元末有了菴處士者有隱行吳人宗慕之處士生以材是為公高祖以材當

國初避偽吳之亂不知所往其妻狄苦節自厲携其孤民從

高皇帝命移實金陵遂占籍江寧居焉民至孝尤嗜學多積典墳一時名士王公汝玉鄒公幼亨范

公敬先咸樂與之游然終不仕時稱安節先生遂以文學世其家安節生鼐鼐生綸自號訥齋實公父也少有志世用屢試有司不第退而為祭酒經其指歸者輒成名流三世咸以公貴累贈光祿大夫太子太保兵部尚書兼右僉都御史母紀氏繼母劉氏皆累贈一品夫人公生而魁梧不群幼耽讀書不樂嬉笑即如成人十歲而紀夫人卒哀號過慟聞者傷之弱冠遊鄉校試屢冠多士正德庚午領鄉薦明年辛未成進士授江西上高知縣廉公剽幹節冗蠲濫民德之境內華林山聚盜劫縣

而流移脅從復搶攘縣故無城塹勢甚棘公集鄉
兵嚴訓練多間諜創置鐵蒺藜以拒之生擒流賊
伍廣等數十餘人賊震恐不敢窺境其經濟大畧
槩見於初政者如此秩滿擢監察御史入臺敢言
權貴憚之嘗䟽時政之不便者十餘事

武廟皆見嘉納時彭公幸庵負時望掌院殊慎許
可獨見重公每白事未嘗不摯節又撫其座曰君
真才御史他日當居此惟自愛戊寅巡按河南激
揚有聲明年己卯大比宸濠構逆

武廟親駕六師傳言取道河南有司皇遽欲罷科

公執不可謂薦賢大事試期裁自

聖祖非今所敢移惟當簡閱兵衛督理餉餽以備
之因具疏馳上請罪既而 駕由山東一時咸服
其識是歲中州號稱得人中官劉璟時方鎮守實
陰黨逆濠濠就擒懼及誅乃謀貸取公帑銀四萬
兩欲行賂權奸以幸免積威煙灼諸司莫敢言公
力排群議而面折其奸璟銜之圖面

武廟以他事中傷公公不為動無何璟敗露姦不
獲逞因顧謂同列曰前銀若聽其貸取今當籍沒
抑屬之官乎將稱為私藏乎衆尤歎服嘉靖壬午

巡按福建風裁益勵監臨試事立法詳密而得人
視河南為盛明年癸未在告尋丁劉太夫人憂訥
齋公亦就衰遂乞終養 詔許之乃構樂壽堂于
別墅集賓朋以娛親志侍側色養于于如也及親
疾亟朝夕躬事藥石凡浣濯興寢必扶持之如是
者十年訥齋公頷之曰吾兒何自苦如此撫按交
章論薦謂公孝養純篤才望無隆難淹家食及訥
齋公卒終制 詔起之以御史提督畿內學政崇
修教化惇尚古道寬沙汰之令抑奔競之習士心
感悅以直言忤 旨當廷杖皆伏闕乞代踰年陞

南京太僕寺少卿改太僕太理寺少卿所至奉職
循法人無敢干以私戊戌陞光祿寺卿躬約省費
慎出納裁汎濫公私便之甫數月陞都察院右副
都御史撫治鄭陽拊循流移惠卹齊民寬嚴並濟
上幸

顯陵及

獻皇后南祔公皆竭心矢力調度供億往來扈從
倉遽立辦

上嘉其能兩賜白金綵幣庚子陞左副都御史協
院尋陞兵部右侍郎歲旱漕河阻塞言者䟽請才

望大臣往

上勅公以兵部侍郎兼左僉都御史督其役公往
來諏度求故道濬源泉甃治閘壩以時畜洩挾復
安山南旺昭陽馬場諸湖定水則河溢則懸河入
湖淺則注湖入河以平旱潦迄今賴之績既奏陞
南京都察院右都御史秉公考察黜陟惟允丙午
陞工部尚書却器樣常例董治琉璃河 圓明閣
工鉅費省是秋歷正二品俸既三載

上念勞勩兩賜白金綵幣丁未改都察院左都御
史掌院事獨持風紀朝士嚴畏每念幸菴彭公之

言曰吾不忍負知己九月陞兵部尚書兼提督京營簡練嚴明尤善酬量邊務動中機宜是歲冬總督三邊侍郎魯公銑上復套之議公方疏請

上裁會銑罷

廷議以西陲重鎮難其代公上疏

請行

上悅特賜鉞幣以公代銑既陞辭即單車遄往誓以死酬國乃揭榜宣諭德意停徵造之需緩不急之役蠲無名之費委將帥集客兵廣峙畜固要害謹慎探明賞罰撫痾瘵躬持儉約與士卒同甘苦邊士莫不感泣願效死力威聞境外漢中劇賊為

亂公督兵首平之撫其餘孽

上聞賜以金幣是秋虜犯甘肅又犯延綏前後斬首三百餘級蘭州邊牆坍塌公修築之延袤數百里凡埤堡壕害曲盡其法自蘭以西民恃以無恐既而虜窺固原又窺甘州竟堅壁不能犯已酉虜犯延綏寧夏甘肅及番夷跳梁不靖公皆督兵力拒之前後斬首二百餘級俘獲數十人先是辛卯以後哈密失守屬番錯居甘肅內地公曰是養寇遺患也曷亟圖之乃先結以恩信申華夷之辨以諭之隨為之繕治堡落室宇及牛種之具俾徙其

居於嘉峪關外番夷感悅遂移其毳幕數十餘里
內境清謐

上聞大喜仍賜蔭降勅褒獎是秋虜入榆林將大
舉內犯公諜知其狀乃先調諸路兵分布於榆林
之西復選精銳數百人伏于嚮水堡之東以伐虜
謀初虜卜西犯不利解其陣去顧謂東之無備也
果以輕騎三千趨嚮水堡伏卒盡發虜驚亂斬首
六百級獲其牛羊駝馬戎器以萬計遂咸噉指北
遁以去捷聞

上溫詞獎勞加授太子少保階資德大夫正治上

卿庚戌秋番夷大肆猖獗公倉卒調兵剿平之斬首七十餘級黥虜隨寇甘肅又悉其衆寇寧夏寇延綏公皆出奇設伏前後斬首六十餘級又招撫四鎮降其素黥項者千餘人

上兩賜金幣嘉諭時古北失守內訌京師戒嚴公身督重鎮恨不能荷戈入援乃檄延綏遊兵一萬二千來援虜退

上嘉其功優賜金幣辛亥春虜欺精銳既入衛屢肆搶攘侵掠諸鎮公乘其驕調兵搗伐巢穴斬首九十餘級而再犯甘肅斬馘為多及俘獲番寇自

是胡人望公旗幟則相顧駭愕曰王太師兵又來也無敢縱意南牧者公尤時防其內犯修築延慶二郡各屬地城堡山寨窯洞四千六百有奇墩臺凡十有二及蘭州邊牆八十餘里蓋皆諸鎮要衝戎虜出沒之區也

上益嘉賞壬子秋甘肅有小警公怒其犯順躬擐甲胄破之馘其醜三十餘時歷正二品俸既九載上嘉其績有勞勩加陞太子太保階光祿大夫令制未有初授者蓋殊典也公具疏乞免

上溫詞勉公就職益感恩渥誓死以報然焦勞邊

守衝齧霜露至是數載而公神憊病作矣癸丑春
尤力疾調兵分布於延寧要地會虜寇二鎮復追
破之馘其醜七十餘又慮逆謀叵復檄諸將領
務奮勇畧母嬰城坐視母貪功寡謀墮賊誘計動
必萬全以成永利益將悉驅驕虜大樹奇勲而病
且亟撫按以聞

上賜公致仕 命未及聞而公奄先逝矣時閏三
月三日也方公病亟仰天呼曰嗟乎予負國恩天
不成予志乃今已矣問其家事則無言而瞑三鎮
將士無不號慟失聲者嗚呼使公而無死西陲鎖

鑰不將有永賴耶然自公西鎮數載矢無遺鏃而
天驕斂手西鄙晏然屹為干城死而後已公可謂
不食其言矣所著有漕河奏議撮稿三秦督府全
稿總府奏議若干卷行世及所遺詩文表奏藏于
家者尚彙積云生於某年某月某日距卒享年六
十配劉氏先卒繼娶江氏再繼李氏俱累封一品
夫人子男三曰管曰籥江所生也曰竹李所生也
二子皆以公功廕國子生竹尚幼女二各有聘而
未適癸丑冬公冢嗣管既扶公櫬歸卜兆于白山
之原於是循例乞請于

朝拜乞墓銘表誌于名碩君子公同鄉郝君某謂
其以文詞為職業爰屬為狀敢忘其謏鄙而漫述
其槩俟秉筆者采錄云

封承德郎刑部貴州清吏司主事海濱章公
安人何氏行狀

公會稽隱君子今僉事君煥其子也諱穡字世寶
世居會稽之偃山號樂畊居士後以居瀕于海別
號海濱當春秋之季附庸之國曰鄆齊人伐之遂
去邑留章子孫因以為氏南唐時太傅仔鈞居閩
之浦城夫人練氏有全活一城民命之功入宋十

五子二十七孫皆至通顯於是浦城章氏聞天下至高宗時有名彥武者自浦城避難至會稽之稷山練塘後徙偁山而偁山章氏之族始著元及

國朝世有聞人顯官如某官某官某官某皆其裔孫也蓋章氏盛於會稽為越右姓而在浦城者始微矣彥武六傳生省元珉珉有儒行是為公之高祖珉生玄玄生謙世皆隱德不耀謙生碧碧配金氏積仁累行齊德而居是生海濱公公生而端毅醇篤孝友莊儉恂幅不華與人交誠意款接無賢愚貴賤大小必罄其情見必諄諄論道故舊問勞起

止有語孝弟陰隲事未嘗不撫掌擊節稱快性嗜
酒而不為所困命招必造飲盡歡其天植之厚如
此少從事舉子既而不就遂投意詩歌放情丘壑
隨意所到長篇短什根極性情自成一家言不求
工於詞也尤銳情堪輿家學翻閱堪輿書至寢食
並廢遇嘉山水窮源討幽尋宗析派必得其所止
而休焉翛然自適人莫得而知也五十鰥居不再
娶時僉憲君方齟齬而岐疑有知識公誨之曰若
無以而母早世自棄而能勉成令名母猶不死矣
僉憲君跪而泣曰大人之言是也煥敢不力及長

公惟以讀書明道立身揚名光裕後先為訓暨弱冠兩舉不第公尤督勉懇至曰若不奮策何以答若母於地下僉憲君又跪而泣曰不才淪落大人之言是也煥敢不力嘉靖丁酉僉憲君始發解浙省上春官輒取上第廷對以病在告公曰幸而成名毋志愜矣顧草茅殊遇何以仰答隆恩乎僉憲君則又跪而泣曰達當委致大人之言是也煥敢不力辛丑春入對大廷公與偕往逮列甲榜授任刑曹公充日以省鞭朴重民命為言以故僉憲君讞獄貴陽詳明多所平反司寇聞公石塘剛嚴自

持素慎許可諸司憚之嘗按君錄囚部署時將決死者十三人君釋其六石塘公服其平允甚稱賞之皆公義方之所成也乙巳秋

宗廟再成覃恩內僚公獲貤封如子官明年僉憲君領令命僉憲江西又奉公以行臬臺故嚴絕公雅興不樂輒思歸僉憲君會當入

賀遂由便道扶持公還無何疾作程限甚迫而僉憲君戀戀不忍去公曰王事孔棘慶賀重典毋以父子私而稽誤得罪貽而父憂頻促之行僉憲君始行尋疾革竟卒時僉憲君已竣事無程而歸渡

淮而訃至公効勞之裏蓋可無憾已配安人何氏
處士何淵之女錫典以子貴贈如公封安人柔和
婉順天性孝敬母李氏無子安人事之備極子道
內奉姑嫜外贊夫子皆斷斷有方儉勤苦勵海濱
公儒生授業外方簞瓢屢空尤不能俯仰於時俗
而安人躬刈漚麻葛夜分胼胝上為姑嫜備承甘
旨下為海濱公綜理朝夕之須稍無愠色每對客
撫僉憲君曰家故貧窶而有兒穎異必能光大吾
家吾何恨也正德戊寅安人妊娠忽夢坐小舟入
叢棘中既覺而嘆曰嗟夢何不祥吾其不穀矣及

產而得子一夕血暈已而張目呼僉憲君曰汝謂誰汝謂誰僉憲君曰兒也遂執兒手而瞑嗚呼若安人者所謂知廢興存亡者非邪海濱公生成化戊子月日卒於嘉靖己酉日享年八十有二安人先海濱公三十二年而卒距其生成化月日享年三十有六初生子男二人長伯煥早卒不娶次即煥先名仲煥為令官娶某氏封孺人女一人適稷山孟某安人先已權厝某地僉憲君茲卜地曹娥江鳳皇窠蛇山之麓以月日啓窆而合海濱公之柩葬焉復生也晚顧以僉憲君謬委不可以

鄙劣辭敬詳其世系及翁夫婦懿德掇其大都如此

吳太孺人張氏行狀

太孺人張姓而適吳淳之女鴻之配今行人僂之母也世居山陰之穀社里其歸吳也蓋不出鄉云太孺人幼時方襁褓而失怙女兄弟同居獨以沉慧鍾愛於母氏比長吳君聞而將聘之人或以吳君孤子為辭母曰吾方嫠居而此女獨知吾苦俾其適孤子也當克相之矣曷許之故太孺人之歸吳也婉順而孝敬家貧無肥饒共朝夕而事其姑

安節孺人常餐備甘旨晨昏寒暖咸當其意吳君
回盛德士然遭家中廢太孺人力勤織紉刈漚麻
曷晝夜不徹於是吳君悉家事盡委太孺人太孺
人又善事事動中肯綮事有不可不忍直拂夫君
意必微詞再三調而止之嘗謂吳君曰吾母以先
生孤子吾亦孤女故使侍執巾櫛先生疆為善以
貽子孫而子孫有大顯則吾母之志行也吳君感
其言益刻勵樹德於丘壑間鶉衣白頭不少俯仰
於人及生三子長而撫教之諄諄有方宜農而命
之農宜儒而命之儒咸出太孺人意鄉人模為母

範焉初太孺人之事其姑也姑方孀居憂苦人所不堪太孺人善候顏色承意志扶持侍奉者垂四十年姑忘孀居之苦而令節卒賴以全比姑卒呼太孺人曰孝婦吾非若何以終晚節吾孫非若何以成儒名然吾以清白遺子孫若以孝敬遺子孫吳氏必有後矣今距其姑之卒若干年太孺人遇歲事展墓輒盡哀致虔不少替逮其生辰諸子羅而奉觴欲為壽太孺人蹙然曰若祖母安節婺居五十年貽子孫者不小矣乃若輩不肖無能光大先人之望吾何以壽為輒罷其觴丙午冬吳子領

書上春官別而請曰大人何以教俊太孺人曰吾
姑安節所遺者清白也兒今儻遇而得官曷母忘
祖母之訓逮戊申夏邸報為行人輒趨赴祠前謁
告其姑曰孫已成進士又與良選皆大人清白之
所送也曷敢忘德其孝思姑嫜老而彌篤類如此
然時疾作竟卒時戊申五月二十一日也距其生
成化壬辰二月二十日享年七十有七歲卒之日
宗前稱之曰敬慈云子三人曰倬曰俊曰偉倬偉
皆力農官仕今官孫男子九人玄孫四人女孫三
人曰元春元泰元奉倬所生曰元善元嘉元和元

幹俊所生元美元義偉所生曰成立成名成德元
春所生曰恩孫元善所生也嗚呼紀傳所稱女德
尚矣異婦梁妻其徽美有足多也若太孺人者儵
勤孝敬隆家人之道成令子之名將非其儔亞歟
某淺鮮不肖無能敷張盛美輒以吳子年雅通家
之誼不敢辭姑狀其畧俟大君子名筆采譔志表
以章閭範焉

處士竹莊先生朱公安人徐氏合塋墓碑

竹莊先生者泰州太守東武朱君公節父也余先
君與公齊年蓋時時稱公篤行君子云嘗結社稽

山風濤烟月偕山人數輩挈罍尊吟嘯于長湖豐
草間感慨古今抵掌當世事莫之逆也無何公逝
距是蓋四十二年而先君亦即世久遺言芳躅愴
焉不能置也今年春太安人以壽終東武君持狀
泣曰子之先大夫與先君善子與余善余仲子與
子之子葭玉相倚又善知余父者宜孰與子即將
啓窆而合安人蔽焉願子表諸墓先是余從武昌
過彭蠡其民扶携老稚率來訊朱令君安否及太
夫人壽嘖嘖嘆息舉手加額以去余既諭其世德
睹是益心嚮慕焉語曰一年樹穀百年樹德宜朱

氏此美詵詵也按狀公諱廷瓚字良器其先家山陰朱尉里宋時有尚公主者今栢舍村蓋有駙馬冢云數傳而為十世祖千十九宣議又四傳為省元仲英始起明經從朱尉里徙郡城省元生德惠德惠生華華生和是號素菴遷今東武里素菴生毅菴公魁配倪氏實生公世以儒力田茂於德義毅菴與其翁並賓于鄉有高行語具邑令劉公誌中公生而端凝雖廢舉子然嗜讀書汎涉百家及陰陽曆律書數為詩闡發性靈不求工也天稟夷亮事其父總家政服官府無微鉅以身任之尤善

色養母有疾衣不解帶旬月藥餌非手製不以進
弟廷瑞為叔後公每諷勸父願以所置產剖半畀
之父輒從其言其孝義長厚類如此正德辛巳父
當部運留都公愀然曰此壯者事耳何以煩大人
乎力請往衝暑劇辛歸而疽發竟不起配安人徐
氏邑儒存古先生輜其父也安人閑靜貞好母趙
氏謂其父勿輕字乃擇諸生中得竹莊公而字之
及笄既嬪事其姑倪翁毅菴孝敬備至姑患末疾
每以指出溷穢久之益篤翁性嚴整安人於脩滲
晨昏奉之惟謹少不當即踖躅無所容竹莊公既

中道不祿翁姑並耄年東武君猶未冠也安人上
備旨甘以養下飲冰檠訓其孤矢志勵節織紉自
給宴如也家三世賴以不替焉平居無惰顏妯語
言笑不踰閭而母儀肅然嘗訓諸女曰多言非婦
人事凡欲言嚙之止矣子婦有過不顯言惟時誦
古言正之卒莫敢犯者越俗尚綺繡中人綰金銀
爲髻殊厭薄之雖貴顯惟荆布爲飾緇髻終其身
雅朴儉勤蓋其性然與余聞東武君言少時竹莊
公誨之嚴嘗曰讀書不必取科第徒耀閭閻爲也
即貧賤得爲善士不墜家聲足矣比長屢試春官

不第太安人又誨之曰通塞命也徒憂何為至計
自給每令傳經就館舍且曰非好若曹冒為人師
第食其力雖薄吾分也苟非道千金可妄希乎迨
就養官邸聞所行利民則喜動眉宇或稍苛峻輒
頻蹙不悅年八十尚手續麻枲積緡錢量口以賑
孤貧彭澤之民迄今頌焉以是孤奉異訓雖阨塞
終不能媿姍姍以求人矧敢陂側險厲以戾當世今
老矣不能自表見顧脂韋頰仰為有道所羞稱吾
知免夫嗟吾大人之積善以教可泯沒不傳哉嗚
呼美桃歆核飲流知源竹莊公與太安人齊德世

或不盡知乃讀是碑及東武君言不足以欽厥所
自哉龍溪王先生越之鉅儒也其誌業已詳茲第
表其大者公與安人同成化己亥生公生於正月
二十日距卒之年七月五日春秋四十三安人生
於九月二十八日卒於是歲二月二日壽八十五
冬某月某日合塋于山陰承務鄉朱鶴山子男二
長即東武君公節次公策女三適祝銀童鳴王偵
戊午造士祝教銀之子也孫男六應賡庶度席慶
孫女二一適郡庠生劉國彥一適湖陂巡檢沈翰
曾孫男三敬循敬脩敬復曾孫女四而應為茂才

高選賡登辛酉造士並以文學皦然於時足世其
家

鳴玉堂稿卷之六尾

鳴玉堂稿卷之七

明甘肅行太僕寺卿前湖廣督學副使山陰張天復著翰林院修撰不肖孫



山東左叅政門人陳文燭選梓

銘類

封中憲大夫都察院右僉都御史逸菴楊公
配贈安人陸氏合葬墓誌銘

封中憲大夫中丞楊公今司寇行中其子也司寇
君方柄用而公耆耄且強一時同朝之士咸嘆羨
其不可及嘉靖辛亥公以疾終司寇君毀瘠解其
任去

上憐之遣官諭祭聞者益嘆羨以為壽終景福如
公者固世所難而俾其親生享榮名歿有殊錫如
司寇君者尤希所睹聞者也余久懷風木之悲於
衆所嘆羨竊以為然已而司寇君持通政使張君
某狀來屬余銘且曰不肖慈闈奄棄已若干年而
墓未有銘今將卜以是年某月日奉先君之柩而
啓窆合焉敢併有請余於是知君於人子至願亦
有未盡憮然者輒據狀而為之銘按公世家故在
順天之通州公諱暉字用昔逸菴其別號也高祖
某魯祖榮祖秀父禮世有令德不顯於時公之生

也醇朴端毅通亮夷直有古長者之風為鄉間所
推信少就業舉子能通曉群籍顧早失怙以累奪
竟去乃依其兄庠生名勝者朝夕礱勵面所以幹
蠶貽後嗣是家業益起然不為里閭馳逐狀取與
之際介如也嘗夜出道旁得遺貲寧還若主至酬
以半公委而去之曰余貪而貨又奚待為人以是
服其雅誼及司寇君既貴益自歛閉惟加意貧乏
周卹之無德色綸巾短褐日與宗婣相夷猶歲時
伏臘必集故舊知己盡懽當路貴人造其廬非強
之不得見見不談及于官府或有所于請第以辭

理從容却之人卒諒其直兄勝既老公事之益恭
有疾必躬侍湯藥比卒如喪考妣殯歛之必罄其
力異母弟膳從弟俊皆早歿公撫其孤嫠恩甚至
膳二女俊一子皆為之擇婚嫁經紀其成立視所
生加恩焉夫世有圓冠句履裒然自好顧攘竊非
義凌駕其宗黨者不少也公乃遜拾遺厚亡弟無
為而為善噫公非所謂義人哉初司寇君之登進
士也令浙之山陰山陰號劇邑司寇君難之公訓
以親民且戒勿擾故司寇君之在山陰也以簡重
稱民有頌官有志去後德而思之既而以績擢御

史歷太僕大理少卿遷都御史至今官敷歷中外
位望隆顯公尤不忘箴警人每誦其義方云初封
文林郎再封中憲大夫大理寺右少卿改都察院
右僉都御史是年二月初九日卒距其生天順戊
寅十一月二十六日享年九十有四配贈孺人晉
恭人陸氏恭人者同里著姓某之女也性真靜淑
婉不妄言笑弱笄歸逸菴公公素嚴重恭人事之
極莊順儉勤凡烹調紉綴澣濯之務率躬為之不
以委人奉其身極鹿麕而賓祭醢醢則竭誠腆潔
逸菴公謂賢閭閻之事一以容之司寇君出就外

傳恭人相公綜家政斷斷有紀尺紫寸收劑量盈
縮以經出入遂大其積司寇君得肆力於學卒著
勲業母範之助多焉正德庚辰五月初六日無何
病作竟卒時司寇君尚未第也距其生成化戊子
九月二十三日享年五十有三子男五人長即司
寇君次行直行恭行恕行簡孫男子七人衣司寇
君所生早歿立玄亢彥皆行直所生而玄繼司寇
君嗣享卞皆行恕所生而卞為庠生曾孫男子二
人崧嶽尚幼女一適薛澄子棟孫女四人一適刑
部主事張來徵一適太學生李漢一適金吾左衛

指揮使馬應乾一贅州庠生盛明曾孫女二幼未
聘楊之先塋故在通州城東召里今合塋仍其故
銘曰抑抑逸菴維義是耽不報而施大道之咸抒
忠効赤燕謨孔碩敷歷丕休時乃之澤疇報匪德
疇耕靡獲壽考維祺介爾戩穀厥配克賢繄弗齊
年雙玉並瘞今也則全考官玄宅帝命於赫燁燁
厥問輝流蒼碧

醒心徐公孺人吳氏合塋墓誌銘

新化君醒心徐公卒既數月其子應駿狀公質行
泣以屬某曰子知吾父稔乞為銘應駿於某伯兄

少府公為甥壻其溢于諱孝未行不敢辭銘狀曰
公諱來卿字世臣其先三衢人自偃王徙越遂世
為越山陰人歷若干世族寔大華簪相趾元季亂
有太初者避跡若邪山中續系高行太初生性是
為公高祖性生祚祚生封刑部主事公臻臻生工
部郎中公冕配封安人王氏以正德戊辰二月十
三日生公公生五十歲嘉靖四十四年五月二十
八日卒娶吳氏諱師福同邑烏石憲伯公女也生
正德丁卯十一月十九日先公二十年而卒卒於
嘉靖乙巳三月初一日享年三十有九是歲乙丑

十一月初四日啓窆合塋于先兆賴山之麓先是
吳卒而繼娶張氏丈夫子二人長即太學生應駿
次郡庠生應驊女二一適劉炬憲副劉楨子一適
陳樾孫男五宗堯宗舜宗商駿所生宗夏宗周驊
所生蓋皆吳所出也公少雋穎工部公為授尚書
弱冠選郡校弟子高等已而業古墳詞涉子史百
氏然不為高論與儕輩談古昔輒止之曰卑之吾
將食其實也為文灑逸名流每見稱賞顧數奇試
每北王安人既早違養工部公亦衰老而居故饒
君蹶然曰卜式張釋之不為後世賢乎遂入貲游

薛雍輒選辟雍高等又試屢北年且五十矣乃謁
除銓曹領判高唐州牧高唐南北要津產瘠歛繁
公署郡蠲濫節冗蘓剔民隱北士罕學為倡經術
嚴功令士多所嚮就歲祲遺載道出粟賑飢立
義塚收遺骼頌聲蔚然茂起部使者廉狀褒表相
屬于道秩滿謂得顯擢竟拜新化州同知士民喁
喁以公地不副望為惜公忻然束裝無幾微動顏
面明年單車入境間關於嶺箐間者旬月僕夫弛
擔而有難色公怡然曰炎風朔雪不當為
朝廷布德元元耶治之如治高唐境隣崑崙峨昆陽

島夷蠢動當道檄公撫勦公芟渠孽而緩脅從以
法久之恩信浸漬民夷安堵督撫異之將薦于
朝而公勞劇病侵矣數乞休無俞可者明年檄公
齎捧入賀既竣事投檄而去躬視田作與傭伍相
勞苦宴如也歸踰年而病不起矣公生長宦閥束
修自厲剪刮高華之習日親錙綺而所需極纖嗇
側身里巷僦室以居不事藻飾與人交母望推轂
亦不為城府較計自謂鋪糟啜醢而心獨醒故自
號醒心云噫卷輯休澤如公可不謂恂恂君子哉
孺人吳賢而善佐儉勤孝敬壺行攸備十歲時烏

石公授女史孝經歌成誦自謂得女師笄而歸徐
凡脩滄蘋蘩之奉雅若閑習翁始謂賢歸二年而
姑卒營給喪塋總總而序比翁壽終亦克以禮嫻
族外內雖如也肅如也無何妊而疾作應駿甫弱
冠孺人目之曰大夫締創懋矣若父違時未即卒
大人之志若曹勉亢爾宗以繩先德毋徒嬰兒嬉
戲貽吾地下憂哉言訖目瞑醒心為大慟曰天乎
喪吾良友嗚呼斯亦不足賢哉銘曰吁嗟徐君歛
德含精視世陸沈我心則醒厥佐克淑貽子以穀
鬱鬱乎佳丘並瘞雙玉

鎮守遼東總兵贈少保左都督特進榮祿大
夫殷公墓誌銘

公諱尚賢氏殷字某其先廬州合肥人洪武初有
諱成者隸籍宣武衛已而改隸安吉實公始祖成
子忠屢從戰有功由本衛百戶陞河南歸德衛世
襲指揮僉事調天津左衛於是世為天津仕籍云
高祖彪曾祖貴祖洪俱指揮僉事父健即洪季子
以伯仲無嗣續先勲業健卒公甫七歲倜儻不凡
母夫人馮躬勤養育俾有成立弱冠入鄉校脩詩
書俎豆之業有四方之志嘉靖乙未襲父職迨壬

寅春守禦黃花等鎮改元天津右衛尋掌本衛事
撫按薦其忠幹每加推獎丙午秋用督撫交薦守
脩遼東寧遠移駐瀋陽陞山西都司僉書己酉秋
充遊擊將軍督軍駐延安時延安內盜外誑四野
洶洶遊擊為一時創設兵皆市人不習練公受
命儆惕厲忠武身允士卒嚴刀斗多間謀以哨虜
情而叅以遁甲孤虛諸法用能屢殲黠虜奏凱
庭下於是諸鎮之兵延安稱強焉時

天子加意邊陲廣求將材以儲折衝之用公威名
日盛本兵屢推轂壬子夏擢山西太原左叅將

賜勅以往是秋分守大同東路路當虜衝而鉄累
門等口尤極邊隘虜騎時出沒士馬單脆物故每
太半公曰不遇屏華何以別于將邪益勵忠奮謀
務淨虜氛以報

主上殊遇屢挫敵鋒斬獲無算時巡撫侯公在圍
急甚公督率前軍衝之圍遂解然虜啗指銜公甚
矣切聞

上嘉賞有加甲寅充分守遼陽副總兵尋陞都督
僉事總兵官鎮守遼陽掛征虜大將軍印 賜璽
書寵諭備至公尤感恩圖奮訓練六軍修繕屯堡

申嚴號令由是軍威大振犬羊懷畏居遼陽三月
降者數百人聞有犯而侵境輒勦截沙磧無外牧
馬捷書荐奏諸鎮聞風思奮而公矢志益勵矣丙
辰冬虜騎數萬猝至士伍不暇行列公聞之躍馬
而出血戰移日力窮矢竭遂遇害訃聞

上憫悼久之用禮官言贈少保左都督特進榮祿
大夫仍廕一子世襲指揮同知 命禮工二部祭
壟如例立祠所以旌忠烈父贈左都督母封太夫
人妻倪氏贈夫人繼楊氏封夫人公天性篤誠謹
夷平居恂恂如儒生而臨事奮不顧身萬夫莫撓

用能樹大節於 熙明之朝俾 羶裘格義塞膽落
魄當世執戟披堅脂韋偷生者視公亦足媿矣語
曰力抗一夫氣作長城 國家神氣不於公有賴
哉然志在死國竟阨其後天道其僿矣求仁得仁
公死不瞑目邪生於某年某月某日距其死節某
年某月某日享年某歲又踰十年為嘉靖乙丑始
克襄事墓在某山之原銘曰翳公之系肇自有商
歷代緜逖世澤未亡烈祖桓桓秉時奮發佐我
皇祚首開功伐維公繼美接武前修糾糾干城克
壯其猷義冽冰霜忠昭日月作鎮邊陲揚麾秉鉞

秦蠶醜虜叛服靡常既緩且伐威德用張厥或跳
梁奮戈向敵抗義殺身之死靡慝訃聞

當宁邱典有加賜兆宅祠血食無涯古稱不朽匪
爵伊德百爾將臣請視此石

太學生娛竹錢君配孺人葉氏合葬墓誌銘
昔余卒業南雍同舍生長洲錢君娛竹雅厚延接
時髦樂與之游即余無足後先固在倒屣之列也
嗣往來虎丘間過公廬清燈子夜呼盧引白掀髯
談劇今昔公負奇誕節好為俶儻非常畫策時時
拘說時事利害鑿可施置聽者傾歛後數年余居

儀曹有知公者招公起署一命顯融可指取公曰
余方避繒弋抗翼雲表能呷訾嚅唼取兒女子寵
榮哉却之再三固嗚呼此其志寧老死牖下而不
肯徼利一時可與萎薶勢途者萬一哉然詘其才
終不少試悲夫公諱寅卿字德明娛竹其別
號也裔出武肅王鏐宋末有端問者以寶文閣學
士知臨江府而終焉遂占籍長洲漕湖之上而漕
湖錢氏與臨安會稽者並聞矣七傳而為公高祖
樂菴公叔厚叔厚生甘拙公槃槃生竹亭公翺配
吳孺人而生公世德具瞿太史所著竹亭誌中公

生而雋達長益謹亮大司寇景山公鳴臚丞漕湖
先生皆公父行也每稱吾宗千里駒云既涉墳籍
貢成均大司成松溪程先生海內宗信少許可進
公鷄鳴講幄尤獨器重顧隨經生試列棘輒不售
而公漸老兄良卿早世季厚卿嚮文學竹亭公耄
齡猶操切門戶公歟然曰忍令大人為吾後勞瘁
一至是乎遂棄舉子屏進取凡公賦私入劑量盈
縮明發歛調繇作斷斷而叙少間則擊鮮治具召
賓朋子姓斑斕婆娑稱觴堂上延師廣塾攬結名
流說經雅歌以是為樂窮日然要以篤躬歛德為

事母夸詡也先是竹亭為仇鄙構陷幾遠謫匍匐
當路極計信雪父用得免而公孝行播於吳中當
析貲季才而幼父欲稍畀美好公謂求好田地易
求好兄弟難輒取其荒下者伯氏持分券而隘其
居北境異日公之京師則陰闢垣益之或以語公
怡然無幾徵季後邁疾伯且先卒凡公役纍纍公
每身代拊兄孤恩薦踰已子比父母疾親拂衾枕
嘗湯藥逾久勿懈益虔迨終兩尊人皆中壽公且
踰耆哀慕如孺子躡踊過禮絕而復甦尤義結宗
黨周貧解紛通俗嚙之其與人交自傾蓋至白首

無諱言詖行所游既廣終不肯寒暄易態即微士亦傾心禮嚮之婣里相構或赴公質平得數語而忤然解去歲侵出粟賑饑喪不能舉待禮而斂者無筭往島夷虔劉海上時與有司出奇批擣士伍生氣公帑詘縮嚮而倚辦又卒應之不辭平生推羸市義寧舍已所事事赴人之急人見其長者輒常負之亦輒棄之不顧樂善自好誠其中不能自解也既卒諸嘗德公者喟然號曰娛竹死吾孰依者里巷為輟舂云噫此與古所稱嚴遵王烈范生之諒田公之義何異哉俾得表見際時宜有足稱

者矣公生弘治乙丑三月十一日距卒嘉靖甲子
八月十八日享年六十配孺人葉氏錫山石族父
北塘公諱椿母阮氏孺人自少穎慧能通內則女
誡及笄歸錢翁姑方事恢拓而祖姑春秋高性嚴
孺人承事咸當娛竹公每挾策客遊兩都委孺人
家政內宗外嫻男女歸聘咸出勗理及營別墅坐
客常滿而孺人又善給餽不乏下至臧獲子女涼
燠授衣孺人手自紉綴人人得其驩心上下雍然
而嚴潔自將進止倬有桀桀二子夜分嚮讀或稍
倦則指織紵示之曰此寸絲續絮而成丈疋夙宵

不繼能有成邪用是冢嗣踔厲克有時名孺人之
教尤多云先公三歲而卒卒之日為嘉靖辛酉五
月二十日溯其生正德丁卯六月十七日享年五
十五塋邑之儒教鄉駕字圩祖塋之次丈夫子二
人應春弟子負娶藩佐周某某女應第娶太學生胡
某女女三人一適大叅曉山徐某子庠士士言一
適華際可一適陳諫孫男一人汝桂聘庠士徐某
女孫女二人一字鳴臚膠泉安某子貞吉一未字
維是歲乙丑臘月二十七日應春等卜奉公柩啓
慈窆而合焉先期走使屬復曰先子辱知於公屬

續之先命乞公銘余感公誼爰為銘嗚呼余銘固
季子劒耳能使公知乎哉銘曰士才而良行誼而
臧寧沈淪於柴桑母回詘於周行歿而輟春疇為
之將阨之彌長聞矣彌章茲君子歲儷德克享世
允其昌

登仕郎見山婁公孺人趙氏合塋墓誌銘

余先大夫同胞伯仲內外凡七人配會稽婁公黻
者實先大夫孟姊而於余為姑氏姑實賢以能亢
婁氏宗余垂髫時嘗撫頂而勗以行誼即老矣奔
走不効無以闡揚先德而猶心德姑言不忘茲所

志見山公者姑仲子也賢肖余姑伯仲間視余甚
驩而遇余子忤義過猶子隆慶辛未春余伏病與
公類余牽苟延而公竟謝人間世以去今古永絕
天也悲夫明年壬申某月某日其子受愛管等將
奉公柩合窆於雙井金和山先孺人余外氏姊趙
氏之墓三子者儼衰經而造余館圖所以志不朽
余德公雅誼雖寡陋薄於文其奚敢辭誌曰公諱
忠字肅臣號見山其先世家金華出宋叅知政事
機之裔機生大護大護生瀚任敷文閣學士瀚生
文冕為紹興鈴轄因家會稽之湖村文冕生小十

六小十六生文文生賢賢生善善生仲名仲名自
湖村徙郡城九節里是為公高祖生四子次曰信
信以次子芳貴贈御史芳嘗魁南宮擢甲第改翰
林庶吉士徙御史於是婁氏族益著信之長子曰
聯聯生黻配余姑張氏伯子曰德季子曰聰並仕
顯仲即公公生而雋異性坦夷孝友少嘗與其姑
之子董宮詹玘者同業器之稍長屢蹶即棄去給
事刑曹尋授工部司織時董公方秉銓有以千金
干公者公拒之勿董公聞之益器公久之會
九廟仁壽啓祥諸宮役起公董作其間以能勤聞

世宗皇帝璽書褒諭之賚以銀綺命鼓吹導還其第觀者榮之時大工既竣例得殊秩已而公猝於宅中號父訃或勸蓋少需之遷秩可指取也况有知公者在銓軸公厲聲曰吾固若等輩耶亟馳歸治喪悉從禮及諸昆析產必自取其劣者至處同氣間則必恂恂友讓自居以優服闋除南會同館大使使屬本兵本兵多繇馬事其劇不減工曹時公能勩則亦與大工時等無何以訖報罷今少傳南渠呂公方為祭酒與諸縉紳惜公去咸為詩祖之郊而公無幾微見顏面視解督郵若脫屣方匣

劍笈書陶然以歸歸則治樓第南日對天柱宛委
坐卧嘯咏其上間與會中諸君觴于蘭亭鏡湖間
賦詩引滿醉酩酊不復知有寥廓舍是則閉門却
掃無他也惟教子孫行善事賑窮篤義而已於是
人益重公及病且革亦唯囑三子以繩祖裕后無
別言先是公嘗夢二童子旛以導公入真君祠至
是藥勿効諸子計不知所出公呼慰曰命耳疇昔
之夢其信哉嗣果不起為隆慶五年三月十八日
距生成化之丁巳十月十有二日享年七十有五
配孺人趙氏山陰贈刑部郎余舅氏簡軒公女僉

事理者其弟也少閑姆儀孝順勤約而濟以嚴肅
其檢飭內外無論子姓即僉事君所稱雄毅者亦
嚴憚之然脩脩溫清當余姑意自結縭至白首姑
每謂賢余少稔聞姑言用能佐公起家延後先公
卒為嘉靖丁卯六月十有二日距生成化戊午十
月十有九日享年五十有八伯子受娶童氏仲子
受娶胡氏季子管娶張氏並國子生方公病時受
選南漳丞得訊歸而公已就木女一適河東運司
知事劉國良孫七大簪郡庠生娶王氏大節娶陳
氏大籍娶薛氏大簪娶傅氏大簪大籙未聘大簪

聘陸氏孫女二長適公安令錢公匡之子罷庠生
應充次適太學生史君术子燧曾孫四曾孫女二
皆幼銘曰公生而肖余姑賢耶公歿而神徵夢旂
耶公塋而銘余豈私於婣邪

明故廣齋居士朱公配孺人周氏合塋墓誌
銘

余屏居城南別館忽有客過焉啓扃而視則鞠躬
士也意必聞宗雋譽其貌頽其言肅而徐其中淵
乎未可涯涘窺也已而出其友應君所著二尊人
狀跪而請曰某先大父嚮誼履仁而早即世逮今

若干年茲大母周復捐棄將啓窆而合焉雅未有
銘懼無以闡先德願托名公華袞片言圖不朽焉
余曰唯唯語曰百年樹德又曰美桃歆核余雖未
嘗善子先太父而竊服子之德足覩其懿矣其何
敢以不佞辭按狀公諱浩字本弘別號廣齋從其
名也其先汴人仕于宋建康南徙扈蹕至明越遂
占籍暨之靈泉鄉尊塘里居焉十傳而入 國朝
諱定夫者為公高祖洪武間以行舉

高皇帝命守濠州治行茂異遷人德之朱因以著
姓曾祖宗立祖惟秩考叔賢配桐山壽氏而生公

伯仲四人公居其季公生而秉至性愿慤方毅繩趨矩步匪善弗蹈嗜施樂誼暨之薦紳名士咸樂與之游平居常恂恂而嚴於課子用致二子嶄然各有成立比其仕也咸勗以清慎矢報君父允篤於友于與其姪若兒析先人之業務自取其劣而以其腴者讓之人以其義比稱田氏云配孺人周氏亦暨著姓女少婉婉閑靜嬪于朱承上遇下咸斷斷姑壽謂賢脩隋漚刈必勤必恪妯娒族僉協其歡佐廣齋公拓祖貽後恤貧贍孤寡每當其意又常訓子女以日記故事女訓童稚忻忻思嚮

必長有成而後已從子鑰以逋稅當得罪貸三百金內于官閱若干年竟還其息舅母陳八十孀居孤且貧月贍粟肉安享上壽而卒至於養跛甥供事癰姊賙族里之不能朝夕與鄉人之值饑歲無告者種種不可更僕數蓋朱氏百年之業至廣齋公而益振廣齋歿二十許年縞裳飯糗閑闕苦節以淑子孫亢其宗孺人之力居多焉余嗣聞于鄉朱氏之興有二異鄰有趙氏者以言相忤其子構于官欲駕以重禍乃佯議和詭計中母以毒將釁朱而甘心焉當是時趙先舉款次當及公公以卜

日不吉乃不舉其日趙母以毒死公竟無恙保其
家又公之父母攢久不得善地嗣用堪輿家言將
卜厝于駱家嶠初往視霧霧蔽天不可以針嚮頃
朗且霽得窮其勝而眺焉龍穴遂定乃購營屯域
今公夫婦之合窆者即其地也天道祚善不於是
二者足驗邪公之卒也為嘉靖癸卯十二月二十
二日距其生成化甲辰十一月初十日享年五十
孺人卒於嘉靖己未十二月二十四日距其生成
化丙午九月二十二日享年七十有四卜葬之日
為萬曆改元二月初十日丈夫子二伯子標起家

給事藩曹授江西鉛山丞在官

年致其事歸娶

陳氏早卒繼娶陳氏生子一有慶省祭官娶清隱
蔣君女曾孫一用中娶吏目東溪陳君女孫女二
一適省祭陳大樂一適壽同漢仲子格亦起家給
事藩曹授廣東增城典史以內艱歸不再出娶田
氏生子三長有學娶婁氏次有光即庠士君文行
踔厲有聲鄉校娶壽氏又次有客娶黃氏曾孫男
三用賓用賢用賞孫女一適庠士壽秉敬曾孫女
三嗚呼可謂森衍矣謂食天之報非邪銘曰瞿瞿
德人五洩毓奇耀弗齊年而茂衍于孫枝毒奸弗

墮大麓弗迷此非天邪而隲者為誰

魯府典膳俞君墓誌銘

昔年余居儀曹嘗納交汝盛俞君每接衽貌恭而詞溫才亮而行確則異之退而言曰此必世德之胄也暨詢其世余甫知為年友憲部庚陽公之弟而魯之膳臣小山公之子也已而會小山溫恭亮確如其子乃又竊嘆曰丈夫之賢蓋必有繇然哉又踰數年以給事金吾築京師外城功例得授八品奉檄佐貳京山京山為

先帝舊邸 陵園在焉諸所剏建與上下酬應旁

午君承之母錯時余董學湘郢會藩臬諸長咸異
之曰何溫恭亮確能集事乃爾也余自滇歸越又
數年衰孱却掃君之冢嗣可成儼然衰經造余門
而胝請曰某父即世某祖亦捐棄無繇表見世德
奉先君命敢微惠于先生以光不朽余既欽小山
公雅行而復追君之夙誼也其敢以不文辭公諱
鸞字廷和世居仁和平里小山其別號也其里
為澗上游之衝材木畢集公自祖父咸以輸材公
私通商趨什一之利爰世其業而子姓則以詩書
為弓冶屬箕裘焉古人所謂業商而行儒者也公

夷亮篤勤自少不欺而遇事尤善籌量藩臬諸司
命董河工儲材輸上公悉條陳利弊頗見施行鑒
有成效頃島夷帆蔽海上當道廉公幹局屬築垣
江許竭心經畫工鉅費節今尚賴之平生與人交
讜直不屈是非可否之際苟屬叅決不為娛阿至
解勞排危百折不摧毅如也以是交公者初或少
公之直久之益德而忘之矣性孝友節儉歷艱虞
上繩下續累貲起家每如常素云伯子方給事金
吾公與偕至轂下觀都邑瓌麗之光嘗過余竊
喜不自勝嘉靖癸丑例授公魯府典膳既拜冠組

益又竊喜謂余曰不意林莽之夫躬逢盛際叨預
一命也比伯子居京山迎公就養官邸凡所施置
伯子必請于公輒曉譬利弊治效益著郢民德公
隱惠及伯子解綬民猶謁公之廬惋戀而去伯子
既已祿養仲子左善恢拓先是回祿中替營構踰
初則仲子之力也可謂能養志已隆慶甲子伯孫
補郡學弟子貢公幸見成立每切光熾之望明年
乙丑伯子以疾先公卒戊辰仲子繼卒公撫膺嘆
曰天乎尚何為哉惟日撫諸孫延師課業以成雅
志間則徜徉雲月嘯傲湖山呼賓朋畜禽魚宴如

也居無何當道又屬公校師備倭強出從事非其志也梓里以嚴有郄之者公違其初心又鬱念二子棄膝下居常舐悵已已臘疾疾大作已而稍瘥踰二年春寢疾三日竟不起於乎公為善而天不祚之以上壽其將侈公之後以報公之令德哉公生於弘治丁巳七月十一日卒於隆慶三月

八日享年七十有六高祖某曾祖某祖某父某皆隱德弗耀初娶姚氏生二子伯子即京山尹松仲子橋女一適朱某繼娶吳氏指揮使吳君文揚之姑文揚為狀甚悉余據而誌之吳氏又先公卒次

娶談氏孫四長即可成娶吳氏次可賢娶殷氏次
可教聘張某女賢教皆仲子所生季可京聘徐某
女亦京山君出孫女七是月某日可成諸孫將奉
公柩寔于某新阡伯仲二君附焉銘曰吳山之墟
耆賢瞿瞿善未食報乃隲其遺英英茁芽邦家之
奇疇曰天也而穆其無知

朱孺人顧氏墓誌銘

孺人諱某姓顧氏吳之華亭人僉事顧公溱之女
浙江按察司經歷朱君孔年之配今太醫院吏目
封之繼母也余雅識經歷君蓋君筮仕為吾郡幕

屬潔修有幹局余故重之時吏目君方章縫侍其父於郡齋與余兒某輩說禮經就余訂旨歸余故益諗其家世與孺人佐內之賢茲孺人既沒吏目君以制乞歸襄其事乃以孺人之從弟行人顧君章志狀來乞銘且曰此葑父千里命介以圖不朽者也余義不可虛辱按狀孺人少敏慧惇慤雖生長名閥而服食麤素不欲以綺麗相矜高僉事公鍾愛之必欲得善士為壻及笄未字適經歷君失偶間以請僉事君躍然曰是子家世節孝余知其行稔遂妻之及歸朱之宗姻僉謂其父叔顯庸於

時而吏目君為先孺人周所生諸幼累累在襁褓
疑或少當孺人意乃孺人柔和淑婉收育撫攜若
不知為紈綺女者事其祖姑華及其姑盧定省盥
饋必適其嗜好姑喜施予每罄其貲以承志弗靳
也歲時奉其姑蠶必身先婢妾采桑以給比繅絲
成則奉觴上壽為樂以歡姑心姑嘗以齋素致羸
疾孺人苦之勉進甘旨無已則婉詞曉譬又割鮮
為具給菜羹以獻俟其食甘始稍稍言之姑亦感
其孝乃黜齋素而疾愈竟致壽自經歷君幕吾郡
繼陞廣之臬司照磨及在泐前後垂二十年孺人

每贊之以庶勤清約人或迂之孺人謂經歷君曰
君節婦子吾清白吏女也得無玷乃世兩無憾矣
以是經歷君所至以庶幹稱孺人相之也初經歷
君將之浙太孺人不欲行孺人堅請留侍及九年
秩滿經歷君歸覲會當遷陟人或勸其速詣銓部
孺人獨力止之曰君母老古人不以三公易一日
之養况卑秩邪經歷君感其言遂止終養踰二年
而太孺人考終君仰天嘆曰嗟向微孺人言孔年
能免終天之罪耶朱之宗姁益籍聞孺人之孝吏
目君自髦而冠而為令官孺人咸誨之諄懇其升

沉憂喜率與之休戚無異情周之二女亦自髫而笄而嫁與其諸孫就傳筮姻咸斷斷以禮視已出者倍蓰過也故吏目君之事孺人亦無謂不已出也生盡誠而死盡哀塋盡力云嗚呼載籍所稱婦德尚矣乃後母之賢槩未有聞也若孺人者忘純綺而甘茹辛慈孝備至也可弗謂順妻令母者哉卒之日為嘉靖丙辰八月二十四日距其生弘治某年十月二十五日享年五十有七所生女三一適劉仕卿一適進士顧中和一適庠士沙魯其子一即吏目君封又女二一適庠士姜白一適太學

生錢邦直及葑所生孫男子三曰表衮袍孫女二
曾孫男一益皆周所出云銘曰猗嗟淑媛少毓名
閨諏慶門嬪吉人維德之齊閑內則以撫厥遺彼
髦而髦咸若其宜疇曰婦貴疇曰母後上下其攸
毗貽爾子穀貽而孫穀詵詵蟄蟄厥功繄誰

勅封安人包氏墓誌銘

杭會府也去越郡僅一水今憲副小海馮君為諸
生時藝行冠杭之多彥余從郡中集省下輒望見
稱同袍及君為武選大夫余亦備員職方比叨視
學則楚臬也兩與君同官周旋既久備聞君配包

安人之賢今年夏余行部自荆南歸君款余私署
整暇靜嚴治具必飭余羨君內理君曰吾筮仕逮
于茲稍能守官歲夙夜在公家事不問而治惟吾
荆室之淑慎有相也余既得于所聞又親奉君言
竊為君喜之居踰月一夕君令人扣余署甚急急
赴問則安人危矣安人素無疾忽暴中不可為乃
因君欷歔隕涕焉嗟嗟閨秀實稀懿行難備如安
人者寧不為吾僚友悲也君將輿櫬歸錢塘卜塋
有期自為狀謁余乞銘不可辭爰序而銘之包氏
杭右族安人父蓮橋公倫母王氏生而婉孌性聰

慧父母最鍾愛每相謂曰吾女清淑法當貴乃相攸必擇俊髦士及得小海君公喜曰此真吾壻也外屬有以儒素聞者弗聽遂歸之時年十九執婦道嫻于內則甲午君舉于鄉甲辰登進士第丁未授兵部職方司主事在官多賢聲安人從于京邸所以相君者一如君之自言也三載考績勅封安人初君之考職方公早世獨侍太安人太安人嚴方於卑幼慎許可獨安人能祇承妣順當其心姑之所嗜在精鑒其中饋之敬進者如其所嗜也姑之服御在靚素其縫裳其置器無垢無咎咸若

其所服御也織絰組紃勤而紃巧曰吾姑之于女
紅甚工也吾將庶幾焉宗姻族黨施予必周曰吾
姑之施予不吝也吾敢悖予以是太安人愈慈愛
之每稱吾門有賢婦馮氏之慶也太安人有疾夙
夜在寢衣不解帶疾亟刲股肉和藥以進及卒哀
慟不自勝毀而將殆其孝敬蓋得之於天性者又
敬君如賓終其身無乖忤之語亦無燕昵之容凡
君之食飲衣服器不假手于下必躬親烹庖紃綴
拂拭以待不特於姑然也其撫育所生則又慈而
不暱能舉義方幼即不令詈人及浮誑畜婢妾僮

奴尤有恩小失不遽譴君或以侍奉之缺有怒色則亦怒詰之冀君旋解竟無意於峻責也嫁雖久思父母不忘一穀一簋稍鮮美必奉致之于金帛錢穀雖纖微非君命不私饋也杭俗奢靡婦人多錦罽繡綺金珠雜寶之飾君性澹約安人同心厭俗守素雖練衣銀飾亦不甚備獨好觀女訓列女傳諸書及史鑑往迹下逮稗官小說皆能覽記紬繹古義每自比于雜珮云其在楚臬戒臧獲謹局鏞肅而有禮賓交之饋並中節度則余之所親覩也若君所云世路宦情得喪升沉感慨憂憤之懷

有難與友朋言而獨內相揚權者莫不鬱暢宣幽
切情會理使超然累釋怡然鄙消則又有鷄鳴靖
好之風焉殆君之所獨得而狀有所不能盡者嗟
乎宜其哀思之獨深也安人生正德乙亥十一月
十有九日卒之辰嘉靖己未歲六月八日也年四
十有五將塋于某山之兆子男一有翼郡庠生娶
陳氏進士遂初孫女女一文姬適梁大壯亦郡庠
生孫男一銘曰猗昔高士志行遵梁鳴王霸婦道
敦彼美可齊終隱淪大夫致身凌青雲婉婉淑女
相在門何以擬之桓少君後千百年視斯文

孫母吳氏富孺人墓誌銘

富孺人者休寧孫處士公永之妻也吳姓而諱富
世居邑之上山與處士同產有宋文肅公之後曾
祖轅祖濩父若容皆不仕而有隱德為閭閻所推
崇孺人姿婉淑醇謹少奉姆訓刈漚麻葛克事女
紅承顏奉歡尤出自天性女士儔咸歛衽謂不逮
也其父母鍾愛之慎擇所匹以歸公永既歸恭上
勤祀內外雖肅有儀度公永家故肥饒而孺人不
有其富刻厲蘋蘩自奉每極粗糲而事其翁夫子
晨昏燠寒之需賓客醢醢之具未嘗不竭誠腴潔

族黨鄰好禮餽必豐或以之告盡力賙之雖屢遭
不厭勝貳平居遇以恩禮終其身無忌色視側室
子如已生自垂髫以至婚配常畜以與其所生而
擇其豐者以歸側室之子其孝敬仁愛類如此公
永好義樂施鄉稱長者而孺人總內理夾贊有方
賢業日起正德丁丑邊餉不給孺人罄奩貲以畀
公永奉 詔入粟輸邊得膺 錫典拜冠組列銜
七品二子客吳越前後若干年居日充盈稍無內
盼人咸謂孺人綜幹之功云嘉靖丁未二月十九
日以疾卒距其生天順己卯十二月二十二日享

年八十有九嗚呼若孺人者非所謂五福駢叙者
邪子男三長曰文洪娶吳孟希女繼娶黃尚志女
次曰文壯娶程瑛女文壯早卒季曰文秀娶戴璋
女文洪文秀素以文雅重於吳越名士多與之遊
孫男三曰春魁曰春時曰春暘春魁春暘早卒曾
孫男三曰麟生曰儒生曰慶生玄孫男一孫女四
曾孫女一各未聘適文洪輩將以是年月日奉孺
人柩厝某山之陽先期持其同邑名士張子貞甫
所為狀來乞余銘銘曰倚嗟淑人壺彝丕式配德
娠祥慶餘善積有燁其子有茁其孫煌煌母儀是

蹈是遵熾爾氏族孰貽爾福孝敬仁良淑人之穀
誥封淑人史母范氏墓誌銘

范淑人者今南中閩使史公符之配也史公既鞅
掌王事嚴蘭書居南中三載初叅蜀閩久皆單車
行也嘉靖甲子余至南中接衽史公時時稱淑人
賢是夏五月報淑人且病蹙額謂余曰符幸甚獲
邁熙朝經營遠徼少樹尺寸從下執事遊然佐
之實德吾婦微吾婦殞折久矣何有此也余訊狀
則曰丁亥之歲
止以廟建徵材于楚符馳驅臨口山箐間吞齧毒

厲中危疾日就尪羸購治無從也踰歲垂殆婦愁
悲焚香祝天洎泣告祖禰乞以身代已乃引刀自
割左股婢有從者跽膝堅沮之不止竟割入庖所
糜羹以進符食之甘踰夕沉疴如失也既婦創甚
色悴詢之語前狀時所從婢且告余割時赤光徧
室神若相之云嗟乎符微吾婦何有此也今且糜
於宦不遑家室矣獨念婦能捐身拯夫難即婦難
夫不能從也將謂何乃以狀請傳覲采之彤管居
無何而訃至史公反袂掩泣曰嗟乎符終不能面
吾婦矣且殮不躬藥不及嘗也令吾婦忍須臾母

死不當晉承 休命報佐我勞苦乎而乃不待命也命也顧徽惠君子志不朽按淑人與史同里父指揮同知范震母鄧氏世以勲聞著淑人生而幽閑婉婉不狎於女穉父母鍾愛之擇可歸乃歸史公時佩其父教誦孝經女史為內則至締葛組繡百女紅尤善當是時兩姓鼎盛其翁叅將公偕配陶淑人方顯仕而叅將母李太淑人且在堂淑人又閑於饋養入門修醢酒漿酬饗無弗當意者妯娒長幼閭內外斷斷如也姑陶病疽呻吟良苦淑人晨昏事之稍不避溷穢既喪亦感毒疽殊死而

悲號毀瘠不置也史公雅好士坐客多豪賢淑人
時為擊鮮張具務腴潔久之弗懈益虔洎績顯奔
走沅湘吳越滇蜀間凡若干年史公誼不內顧而
家口待哺於淑人者每數十百人餽予嘗瞻人人
母不給乃自奉纖嗇終其身無踰荆布殆中人所
不能堪也至要束子婦稍違越不檢即拒不內母
相見即匍匐請更過乃已吁嗟乎淑人孝敬儉勤
天篤其性非漸摩使然乃貽謀樹軌又敦厲甚嚴
也斯其夾相夫子成令名四方而詵詵蟄蟄遺厥
澤於蕃胤續述先業克光令緒者歟淑人卒於是

年五月五日距其生正德甲戌某月日享年五十
有一某年月日以夫貴 誥封令秩某年月日塋
於安樂門祖塋之側子男七若佚娶馮氏若魚娶
馬氏若麟娶伍氏若鼎娶張氏若鑑娶莊氏若猷
娶陶氏若衡聘梁氏佚鑑皆郡庠生有文行而魚
麟鼎咸以軍功授冠組女一適指揮同知鄧松孫
男五載道載仁載義佚所生載德魚所生載登鼎
所生孫女五一已聘四尚幼銘曰婦也士行夫子
是匡顓天剖股厥齡用康樹勛四方婦行則先生
也同戩歿也彌章疇嗟夫子而殮不貲而藥不嘗

於休令淑百世不亡

傳贊類

徐先生傳

徐先生璉故學正曦之孫也曦秩祀有傳正德間先生以鄉貢繼至抱遺經造士敷教主白鹿洞規率先躬行而後條約明孝弟力田之訓士訢訢知所嚮往有貧不能葬者輒揮金助之風誼追軼古人而魁岸不群約已介如也暇登四可臺徘徊五清書屋與門人談述經藝多所成就彬彬有鄒魯之風焉移官四川綿州學正諸生攀挽不能舍去

尋追祀于學宮後綿士亦德而祀之其子儀制君
以沔生因而命名蓋先生亦不忘沔云

史氏曰博士幽玄吏非世歆豔所及乃徐先生傳
經楚蜀士靡然從之歿且益堅愛慕反踰達官貴
人何哉語曰桃李不言下自成蹊信矣當世長紳
句履北面弟子非不儼然師也而操行風率不逮
士或背而疵之嗟視先生何人哉

張巘山先生像贊

於休偉人渥表華中嶷嶷鵠立巖額星瞳經笥武
庫藝圃推崇夙步紫庭黼黻南宮乃秉文鐸陶

治時伺摘揚藻雅玉激群神化覃棘道儀桀攸同
休沐含毫嘲月吟風童冠追趨沂柳雩桐溟稱夫
子國曰夔龍言念遐軌簪組喬松

蓬萊圖自贊

眇爾形鞠爾躬白首無聞清時靡容沉冥鏡波徒
攘臂于藝場而爭雄

鳴玉堂稿卷之七尾